



## Սիփան Շիրազ

### Երևանյան քամի, գարնանային քամի

Երևանյան քամի, գարնանային քամի, -

Օ՛, մանկության ծառեր, - օ՛. իմ նման տխուր, -

Մենք մեր սերը մանուկ ցայգալույսի ժամին

Ցրում էինք բուռ - բուռ:

Մենք՝ իջնում ենք կամաց, դուք՝ կանգնած եք մնում, -

Օ՛, փողոցներ ծանոթ, սրճարաններ՝,

Մենք՝ երազներ գտած մեր օրերի հեռվում

Փնտրում էինք մի սեր...

Բայց փողոցներն հիմա էլ չեն բուրում հույսեր.

Ճանապարհներն հիմա մեզ տանում են հեռու.

Լրջացել ենք մի քիչ, ունենք նաև հոգսեր -

ՈՒ գործի ենք գնում...

Երևանյան գարուն, երևանյան քամի,

Դուք բացվում եք նորից, բայց մենք ծե՛ր ենք, տխո՛ւր,

Մենք հոգնել ենք հիմա - ու ցրում ենք վերջին

Երազները բուռ - բուռ:

\*\*\*

Եվ հեռավոր իմ թախիծը լույս կդառնա,

Եվ հարություն կառնի մահվան ամեն թափոր -

Նահատակն իմ կբարձանա սանդուղքն ի վեր՝

Աչքերի մեջ ու աչքերում Աստվածամոր:

Նժույգներն իմ կթափառեն լույսի մեջ տաք,

Ու լեռան մեջ կապրեն ես էլ ու լեռներում՝

Որպես մի բարկ հիշողություն, տեսիլ, նվագ,  
Աղոթք մի բարկ, որ ապրում է լուկ երագում:  
Ես իմ լեռն եմ, լեռն իմ Եսն է թեկուզ մութում,  
Ես ապրում եմ հարության մեջ՝ կապույտ թափոր -  
Եվ արյան մեջ առավոտի լույս է կաթում  
Ու հավատում լույս արյանն իմ Աստվածամոր: